

Premessa

Molti anni fa, nel gennaio del 1989, l'azienda di smaltimento rifiuti del Miranese aveva collocato in Piazza Rosselli, nel cuore di Spinea, una delle più belle della nostra cittadina e dove tuttora abito, uno di quei grandi cassoni per lo smaltimento dei rifiuti speciali ed ingombranti. Una scelta inopportuna e di una bruttura insopportabile, uno sfregio alla bellezza del nostro quartiere che noi residenti abbiamo fin da subito contestato e combattuto, una piccola guerra che abbiamo vinto in poco tempo.

E' stato poi realizzato un eco-centro, in un'area defilata del nostro quartiere dove vengono portati dai nostri cittadini e in maniera ordinata e selezionata i rifiuti "speciali" di ogni tipo, materiale, ecc..

Spinea è risultata nel 2014 al primo posto nella raccolta differenziata della nostra provincia ed una delle più virtuose del Veneto.

Tutta colpa del casson

Povera.. nostra piassa,
ti xe tuta 'na scoassa!
Col casson e i cassoneti
i te fa solo.. dispeti.

Vien da ti i rotameri,
a cartoni e anca a veri,
i remena la porcheria
che i te vol portar via.

Dentro e fora tuto el giorno,
i te sporca tuto intorno,
de cassette e de verdura,
ghe xe tuta 'na cultura;

no parlemo dei cartoni...
i te roba quei più boni;
se no basta tuto el dì,
anca la note i vien da ti,

i te svegia sul più belo...
e i te furega el buelo.
Ti xe ormai cussì famosa,
tuta sporca e indecorosa,

che i vien nei dì de festa,
a vardar cosa che resta;
riva gente in trasferta...
a vardarte a boca verta!

Da Mira, Dolo e da Miran
i morosi, man nela man,
i te gira tuto intorno
par trovar 'na stua col forno.

I speta... i sa , che tra un pocheto...
forse riva.. anca el leto,
e magari, su più belo...
riva anca el tinelo.

Un divano, 'na poltrona..
i t'à messo per corona,
do stramassi, un par de rede..
e passienza se i te vede,
anca par television...
ti la ga proprio... su un canton!

E credeme se ve digo...
ghe xe tuto, anca el frigo,
no te manca proprio gnente,
che cucagna per 'sta gente!

Ti ga anca un vater roto,
proprio in vista, là de soto,
riva anca un lavandin...
lo metemo soto al pin!

I te porta un bel bidè...
eco fato: un , do e tre!
Tuta la casa aredata,
in sta piassa avem trovada!

E un bel dì del calendario,
per finir, 'sto bel scenario,
ghe xe stà un gran regista,
co' un'anima de artista...
gà piassà tre bele campane
verdi, zale, cole so picane,
ghe mancava solo quele...
le xe come tre sorele,
le ghe tien el vel da sposa,
a sta piassa ormai famosa,
cussì bela e preparada...
chi gà vùo sta gran trovada ?

Certo uno intelligente,
che contenta tanta gente,
che contenta tuti quanti...
pianze solo i commercianti!

Tuti intorno a quel casson
ghe vien quasi un lagrimon,
che più grandò i lo voria,
tanta roba ghe staria!

A noialtri del quartiere...
resta la malinconia...
e un fià de nostalgia..
per ti, povera piassa
ridota a 'na scoassa,
no la xe mai...
ma proprio mai...
finìa!!!.

Quel Venessian
(Spinetense de adossion)
Spinea, 24 Gennaio 1989